

Կ Ա Ր Գ

ԴԻՎԱՆԱԳԵՏԻ ԱՏԵՍԱՎՈՐՄԱՆ ԱՆՑԿԱՑՄԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով սահմանվում են դիվանագետի ատեստավորման անցկացման հետ կապված հարաբերությունները:

2. Դիվանագետի ատեստավորումն անցկացվում է Հայաստանի Հանրապետության արտաքին գործերի նախարարության (այսուհետ՝ նախարարություն) մրցութային-ատեստավորող հանձնաժողովի (այսուհետ՝ հանձնաժողով) կողմից՝ «Դիվանագիտական ծառայության մասին» օրենքի (այսուհետ՝ օրենք) 33-րդ հոդվածի 1-ին մասին համապատասխան՝ դիվանագետին հերթական դիվանագիտական աստիճան շնորհելու, դիվանագետի՝ իր զբաղեցրած պաշտոնին համապատասխանությունը ստուգելու և օրենքի 22-րդ հոդվածի 4-րդ մասով նախատեսված դեպքում՝ ժամկետից շուտ կամ արտահերթ դիվանագիտական աստիճան շնորհելու նպատակով:

II. ԴԻՎԱՆԱԳԵՏԻ ԱՏԵՍԱՎՈՐՈՒՄԸ՝ ԴԻՎԱՆԱԳԻՏԱԿԱՆ ԱՍՏԻՃԱՆ ՇՆՈՐՀԵԼՈՒ ՆՊԱՏԱԿՈՎ

3. Օրենքի 33-րդ հոդվածի 1-ին մասին համապատասխան՝ դիվանագետին հերթական դիվանագիտական աստիճան շնորհելու նպատակով դիվանագետի ատեստավորումն անցկացվում է օրենքի 22-րդ հոդվածի 2-րդ մասում նշված ժամկետները լրանալուց հետո՝ ոչ ուշ, քան վեց ամսվա ընթացքում:

4. Դիվանագետի՝ հերթական դիվանագիտական աստիճան ստանալու ժամկետը լրանալուց հետո մեկամսյա ժամկետում նախարարության անձնակազմի կառավարման վարչությունը (այսուհետ՝ վարչություն) դիվանագետին տեղեկացնում է հերթական դիվանագիտական աստիճանի ժամկետը լրանալու և ատեստավորմանը մասնակցելու՝ վերջինիս իրավունքի մասին:

5. Ատեստավորման ժամկետը լրանալուց հետո 15-օրյա ժամկետում ատեստավորման ենթակա դիվանագետը (այսուհետ՝ դիվանագետ) վարչություն է ներկայացնում ծառայողական բնութագիրը, բացառությամբ սույն կարգի 10-րդ կետով նախատեսված դեպքի, ինչպես նաև տեղեկատվություն՝ վերջին 6 ամսվա ընթացքում իր կողմից կատարված աշխատանքի մասին:

6. Վարչությունը 10-օրյա ժամկետում կազմում է հերթական դիվանագիտական աստիճան ստանալու համար ատեստավորում անցնելու մասին դիմում ներկայացրած դիվանագետների ցանկը և ներկայացնում հանձնաժողովի նախագահին:

7. Հանձնաժողովի նախագահը ցանկում ներառված դիվանագետների ատեստավորման հարցն ընդգրկում է հանձնաժողովի առաջիկա նիստի օրակարգում:

8. Վարչությունը հանձնաժողովի նիստի օրակարգում դիվանագետների ատեստավորման հարցն ընդգրկելու մասին տեղեկացնում է դիվանագետներին և նրանց անմիջական ղեկավարներին:

9. Օրենքի 22-րդ հոդվածի 4-րդ մասով նախատեսված դեպքում դիվանագետի արտահերթ կամ ժամկետից շուտ դիվանագիտական աստիճան շնորհելու նպատակով ատեստավորումն անցկացվում է հերթական ատեստավորումից առնվազն մեկ տարի հետո:

10. Սույն կարգի 9-րդ կետով նախատեսված դեպքում դիվանագետի ծառայողական բնութագիրը կարող է պահանջվել եռօրյա ժամկետում:

11. Ծառայողական բնութագիրը պետք է բովանդակի դիվանագետի մասին տվյալներ և նրա գործնական, մարդկային հատկանիշների ու ծառայողական գործունեության արդյունքների հիմնավորված գնահատականը: Ծառայողական բնութագիրը կազմվում և ստորագրվում է դիվանագետի անմիջական ղեկավարի կողմից:

12. Այն դեպքում, երբ դիվանագետը համապատասխան անմիջական ղեկավարի ենթակայության ներքո աշխատել է 6 ամսից պակաս ժամկետով, հնարավորության դեպքում, ծառայողական բնութագիրը կարող է տրամադրել նաև դիվանագետի նախկին անմիջական ղեկավարը, որը ծառայողական բնութագիրը ներկայացնում է սույն կարգի 5-րդ և 10-րդ կետերով նախատեսված ժամկետներում և կարգով:

13. Դիվանագետն ատեստավորման անցկացման օրվանից առնվազն մեկ շաբաթ առաջ պետք է ծանոթանա իր ծառայողական բնութագրին՝ բացառությամբ սույն կարգի 10-րդ կետով նախատեսված դեպքի:

14. Ծառայողական բնութագիր չներկայացնելը չի կարող բացասաբար ազդել դիվանագետի ատեստավորման արդյունքների վրա:

15. Եթե դիվանագետը համաձայն չէ անմիջական ղեկավարի ներկայացրած ծառայողական բնութագրին, ապա նա կարող է իր առարկությունները ներկայացնել հանձնաժողովին:

16. Վարչությունը հանձնաժողովի նիստից առնվազն երեք օր առաջ ապահովում է նիստի փաստաթղթերը հանձնաժողովի անդամներին ներկայացնելը:

17. Հանձնաժողովը ատեստավորման արդյունքում եզրակացություն ընդունելու համար անցկացնում է գաղտնի քվեարկություն: Հանձնաժողովի յուրաքանչյուր անդամ քվեարկում է կողմ կամ դեմ (Ձև N 1):

18. Հանձնաժողովի որոշումն ընդունվում է հանձնաժողովի անդամների ձայների պարզ մեծամասնությամբ: Հանձնաժողովի անդամների ձայների հավասարության դեպքում վճռորոշ է հանձնաժողովի նախագահի ձայնը:

19. Հանձնաժողովն ատեստավորման արդյունքների հիման վրա ընդունում է հետևյալ եզրակացություններից մեկը՝

1) շնորհել հերթական դիվանագիտական աստիճան.

2) շնորհել հերթական դիվանագիտական աստիճան՝ ժամկետից շուտ.

3) շնորհել արտահերթ՝ մինչև երկու ավելի բարձր դիվանագիտական աստիճան.

4) դիվանագիտական աստիճան շնորհելու հարցը քննարկել մեկ տարի հետո.

5) սույն կետի 4-րդ ենթակետով նախատեսված դեպքում հերթական դիվանագիտական աստիճան շնորհելու հարցը երկրորդ անգամ քննարկելիս, բացասական եզրակացության դեպքում, որոշել դիվանագետի՝ զբաղեցրած պաշտոնին համապատասխանությունը:

20. Ատեստավորման արդյունքները հրապարակվում են ատեստավորումից անմիջապես հետո:

21. Դիվանագետն իրավունք ունի ատեստավորման արդյունքում ընդունված եզրակացությունը բողոքարկելու՝ նախքան այդ եզրակացությունը նախարարին ներկայացնելը:

22. Դիվանագետը կարող է բողոքարկել ատեստավորման արդյունքում ընդունված եզրակացությունը բողոքարկման հանձնաժողով՝ համապատասխան արդյունքները հրապարակելուց անմիջապես հետո:

23. Բողոքարկման հանձնաժողովը ձևավորվում է նախարարի հրամանով՝ սույն կարգի 2-րդ կետում նշված հանձնաժողովի անդամ չհանդիսացող անձանց թվից: Բողոքարկման հանձնաժողովը կազմված է առնվազն երեք անդամից:

24. Բողոքարկման հանձնաժողովը դիմումը քննարկում է այն ստանալուց հետո մեկօրյա ժամկետում:

25. Բողոքարկման հանձնաժողովը քննության առնելով դիմումը, կազմում է հետևյալ եզրակացություններից մեկը՝

1) բավարարել բողոքն ամբողջությամբ.

2) մերժել բողոքը՝ ատեստավորման հանձնաժողովի եզրակացությունը թողնելով անփոփոխ:

26. Բողոքարկման հանձնաժողովը սույն կարգի 25-րդ կետով նախատեսված եզրակացությունը մեկօրյա ժամկետում ներկայացնում է նախարարին՝ համապատասխան որոշում կայացնելու նպատակով:

27. Դիվանագետը եռօրյա ժամկետում տեղեկացվում է սույն կարգի 25-րդ կետով կայացված եզրակացության մասին:

28. Հանձնաժողովն ատեստավորման արդյունքում ընդունված եզրակացությունը (իսկ բողոքարկված լինելու դեպքում՝ նաև բողոքարկման հանձնաժողովի եզրակացությունը) ատեստավորումից հետո եռօրյա ժամկետում ներկայացնում է նախարարին, որն ընդունում է հետևյալ որոշումներից մեկը՝

1) սույն կարգի 19-րդ կետի 1-ին, 2-րդ և 3-րդ ենթակետերով նախատեսված եզրակացությունների դեպքում առաջարկվող դիվանագիտական աստիճանը շնորհելու մասին.

2) սույն կարգի 19-րդ կետի 4-րդ ենթակետով նախատեսված դեպքում դիվանագետին դիվանագիտական աստիճան շնորհելու հարցը հետաձգել մեկ տարով.

3) սույն կարգի 19-րդ կետի 5-րդ ենթակետով նախատեսված եզրակացության դեպքում զբաղեցրած պաշտոնին դիվանագետի համապատասխանությունը որոշելու նպատակով ատեստավորում անցկացնելու մասին:

III. ԴԻՎԱՆԱԳԵՏԻ ԱՏԵՍՏԱՎՈՐՈՒՄԸ՝ ԴԻՎԱՆԱԳԵՏԻ՝ ԶԲԱՂԵՑՐԱԾ ՊԱՇՏՈՆԻՆ ՀԱՄԱՊԱՏԱՍԽԱՆՈՒԹՅՈՒՆԸ ՈՐՈՇԵԼՈՒ ՆՊԱՏԱԿՈՎ

29. Դիվանագետի՝ զբաղեցրած պաշտոնին համապատասխանությունը որոշելու համար ատեստավորումն անցկացվում է նախարարի կողմից սույն կարգի 28-րդ կետի 3-րդ ենթակետով նախատեսված որոշման ընդունման դեպքում:

30. Հանձնաժողովն ատեստավորման արդյունքների հիման վրա ընդունում է հետևյալ եզրակացություններից մեկը՝

- 1) դիվանագետը համապատասխանում է զբաղեցրած պաշտոնին.
- 2) դիվանագետը չի համապատասխանում զբաղեցրած պաշտոնին:

31. Ատեստավորման արդյունքները հրապարակվում են սույն կարգի 20-րդ կետին համապատասխան:

32. Հանձնաժողովը սույն կարգի 30-րդ կետով նախատեսված եզրակացությունը (սույն կարգի 21-րդ կետի ուժով բողոքարկված լինելու դեպքում՝ բողոքարկման հանձնաժողովի եզրակացությունը) ատեստավորումից հետո եռօրյա ժամկետում ներկայացնում է նախարարին՝ համապատասխան որոշում կայացնելու նպատակով:

ՔՎԵԱԹԵՐԹԻԿ

դիվանագիտական աստիճան շնորհելու առաջարկին համաձայնություն տալու

	ԱԶԳԱՆՈՒՆ, ԱՆՈՒՆ	ԱՏԵՍՏԱՎՈՐՄԱՆ ՆՊԱՏԱԿԸ	ԿՈՂՄ	ԴԵՄ
			☐	☐

«__» _____ թ.

Կ. Տ.